

適園叢書

張宗祥



通國書香

楊文輝



古泉山館金石文編殘稿卷三

唐

宮闈令西門珍墓志

右墓志首尾共三十二行正書字徑五分許志言珍京兆雲陽人曾祖名空而不書祖彭父進朝議郎行內給事賜緋魚袋珍至德初釋褐從仕大歷末擢居宣徽後除內府局丞充鳳翔隴右節度軍門判官德宗俾充荆襄沔鄂洪府宣慰使興元元年除洪州判官監先鋒貞元元年拜內僕令改豪壽觀察監軍判官又遷荆南監軍八年充劍南三川宣慰使又監淄青行營十三年歸闕復任高品順宗嗣位選爲少陽院五品永貞元年賜金魚袋充會仙院使元和元年改充十王

宅使七年充威遠軍使元和十二年卒年七十四其云建中四年王室多故涇源叛卒晝入犯門鑾輿西巡以避封豕攷新唐書德宗紀是年十月涇源節度使姚令言反犯京師帝如奉天志文云鳳翔隴右節度監軍判官時懷光不臣潛與泚合翠華於是更幸梁洋節度楚林果有疑貳公每於衙府輒肆直言諭其將士微以禍福國家靡汙隴之憂州縣免誅夷之弊微公之力殆不及此德宗聞而異之俾充荆襄沔鄂洪府宣慰使興元元年遂除洪府判官監先鋒攷本紀是時鳳翔節度朱泚亦繼反張鎰代爲節度其後營將李楚琳殺之自稱留後朱泚犯奉天禁軍敗興元元年二月李懷光爲太尉反丁卯帝如梁州三月壬辰次梁州五月李晟等屢敗

朱泚復京師六月姚令言朱泚皆伏誅改梁州爲興元府給
復二年又給復洋州一年此其事也蓋珍卽爲張鎰監軍判
官正與楚琳同事然張鎰傳言營將李楚琳嘗事朱泚得其
軍心司馬齊映等謀曰楚琳必爲亂乃遣屯隴州楚琳知之
稽故未行鎰以帝在外心憂惑謂已亟去不爲備楚琳夜率
其黨作亂齊映自竇出齊抗託傭皆免鎰縋城走不及遠與
二子爲候騎所執楚琳殺之絕無一言及珍又韋皋傳言德
宗狩奉天李楚琳殺張鎰劫眾歸朱泚隴州刺史郝通奔降
楚琳則楚琳後仍與朱泚爲亂珍有何功而志乃云國家靡
汙隴之憂州縣免誅夷之弊微公之力殆不及此毋乃失之
諛矣楚琳作楚林志與史異似當以志爲正洋州本析梁州置

境壤相連攷本紀言給復洋州一年而韋皋傳亦云帝在梁洋還則當時德宗必曾至洋州本紀旣云二月丁卯如梁州不當於三月壬辰又言次梁州疑梁州之梁乃洋字之譌攷藩鎮表開元五年置隴右節度又上元元年置興鳳隴西節度建中四年賜號保義節度後吐蕃陷隴右貞元初置行秦州以刺史兼隴右經略使以鳳翔節度使領隴右支度營田觀察使志作於元和時故有鳳翔隴右節度之稱本紀又云建中四年九月舒王謨爲荆襄江西沔鄂洪州宣慰使及除洪府判官監先鋒蓋爲普王時閒官也地理志云洪州豫章郡上都督府蓋普王之從府於洪州故稱洪府云又云兵馬使伊慎下安黃等州貞元元年來獻俘馘攷本紀貞元十五

年十一月安黃節度使伊慎敗吳少誠於鍾山十六年七月
伊慎及吳少誠戰於申州敗之而其先克復獻俘事遺而未
載志又云其年秋改充豪壽觀察監軍判官尋除張建封尙
書爲徐泗節度詔公獨監送上職名如故者攷張建封傳建
封爲壽州刺史李希烈僭天子位淮南節度陳少游陰附之
約破壽州以趨江都建封堅壁據之賊不能東遷圍練使帝
還自梁少游憂死進御史大夫濠壽廬觀察使繕陞治兵希
烈使驃帥悍卒來戰建封皆沮劘之賊平進封階又任一子
正員官貞元四年拜御史大夫徐泗濠節度使則珍爲豪壽
觀察監軍判官卽爲張建封之屬官也前但云濠壽而無廬
後但云徐泗而無濠濠字又作豪皆與史異攷唐書地理志

云濠州濠字初作豪元和三年改從濠此志刻於元和十三年而猶作豪者蓋西門君於元和元年後既營生壙卽屬王元佐撰刻此志乃卒後但續刻卒葬之事而未及追改豪爲濠也廣韻豪下云州名古鍾離國隋改爲州又大歷九年顏魯公干祿字書及韓昌黎集徐泗濠三州節度掌書記廳石記皆作濠州而通典謂隋改楚州曰濠州因濠水爲名唐初因之元和郡縣志亦云武德五年杜伏威附改濠州濠字中間誤去水元和三年又加水吳曾能改齋漫錄據杜氏之言駁洪慶善攷正韓集作濠之誤皆非是惟志又云遷荆南監軍未知其詳志又云八年充劍南西川節度使本紀貞元五年九月丙午劍南西川節度使韋皋敗吐蕃於臺登北谷克

舊州又攷劍南節度於至德二載分西川東川是時西川而志作三川恐三乃西之誤岐山爲鳳翔府屬縣縣有岐山乃京畿近地珍所歷之官以百官志攷之內侍省有六局其一曰內府局有令二人丞二人掌中寶藏貨賄給納之數及供鐙燭湯沐張設凡朝會五品以上及有功將士蕃酋辭還皆賜於庭一曰內僕局亦有令丞各二人掌中宮車乘皇后出則令居左丞居右夾引又內侍省有高品一千六百九十六人品官白身二千九百三十一人又宮闈局亦內侍省六局之一有令丞各二人掌侍宮闈出入管籥又內給事十人掌承旨勞問分判省事凡元日冬至百官賀皇后則出入宣傳等然則珍係內侍省之宦官而其父之官爲內給事亦係內

侍之流矣少陽院會仙院皆不見於百官志而云順宗嗣位
爰選耆德以輔儲皇轉爲少陽五品則知其爲東宮之官也
十王宅者據長安志云改元先天之後皇子幼則居內東封
後以年漸長成乃於安國寺東附苑城同爲大宅分院之名
爲十王宅令中官押之於夾城中起居每日家令進膳十王
謂慶忠棣鄂榮光儀穎永濟也志言內常侍正五品下內給
事從五品下而太子有內方局令二人亦從五品下則此云
少陽院五品者蓋東宮官之大者也惟其初官云擢居宣徽
考宋時有宣徽南院使此院使掌總領內諸司及三班內侍
之籍而於唐志未見豈吏之漏乎節度使有判官一人而所
謂監軍宣慰使者屢見本紀及列傳亦不載於百官志蓋皆

行軍時差遣權置之名無定職也據志珍乃於生前建塋域
猶後人所云生壙也而文銘詞後續題其遷監威遠軍使及
卒葬年月則此志實作於建域之時并卽於其時先爲勒石
者故其首行官銜有磨改跡蓋以充威遠軍監軍六字添入
文後有子四人四係三字磨改而其名季華季煜四字亦有
磨改跡蓋少子亦係刻文之後所生故以其名補入耳惟此
文題鄉貢進士王元佐上並非珍之同姓而稱從姪爲他刻
所未見不可解也威遠軍亦不見於藩鎮表俟再攷之此墓
志前輩皆未見恐係近來出土亦關中之物文云龍首原西
距阿城東建營域攷長安志秦阿房宮一名阿城在長安縣
西二十里後又云遷窆於長安縣承平鄉先修之塋長安志

無承平鄉其所稱修德里蓋卽修德坊也長安志言在朱雀街之第三街卽皇城西之第一街第一坊也

韓文公祭湘君夫人文

元和十五年

韓文公祭湘君夫人文作於元和十五年十月其黃陵廟碑則在後一年長慶元年攷韓文類譜謂祭文卽刻於碑陰而集於祭文後依石本附四十二字云始將旣修樹舊碑仍刻其文於新石因銘其陰舊碑石旣多破落文不可盡識移之於新或失其眞遂不復刻方崧卿韓文舉正云此蓋後人以碑本附入朱文公攷異云此必公所自記故石本有之案公稱舊碑卽晉太康時碑圖記誤爲漢劉景升立者公先作祭文有將求玉石仍刻舊文之語其後不果故復題記於後然

則祭文與此四十二字當並是長慶元年後刻也

著作郎韋端玄堂志

右韋端玄堂志首尾共二十七行行廿五字首二行擠而小
勻正書字徑五分許文爲端之子紆撰書其敘五代祖孝寬
後周大司空郎襄公高祖津隋民部尙書曾祖琬皇城州刺
史贈禮部尙書祖季弼太僕寺主簿考廉尙書庫部郎中端
爲廉之第二子以新唐書宰相世系表攷之韋氏郎公房叔
裕字孝寬隋尙書令郎襄公生六子陵州刺史壽光縣男津
爲叔裕第五子津第二子成州刺史琬琬第六子季弼季弼
子靡考功員外郎端爲靡之第二子端生二子纘紆表載廉
官階皆與志不合自當以志爲正表又誤廉爲靡

今案設古閣本作廉

不以尚書庫部郎中爲考功員外郎并闕端之官又端有五子止載纘紆而遺系練絢且據志言纘工部郎中系陽翟縣尉練鄉貢進士紆兼殿中侍御史絢前太廟齋郎而表皆無之孝寬周書及北史皆有傳傳言韋叔裕字孝寬京兆杜陵人少以字行以戰功歷官尚書右僕射拜大司空天和五年進爵鄭國公周宣帝崩隋文帝輔政發關中兵以孝寬爲元帥東伐關東悉平凱還京師薨年七十二贈十二州諸軍事雍州牧諡曰襄有六子總壽霽津知名據傳所言則孝寬之爲尚書令鄖襄公皆當在後周時與志所言合表屬之隋失其實矣此志不稱墓而稱玄堂爲自來墓志所未見渾化閣帖唐高宗敕亦有使至知玄堂已成之語想當時稱墓爲

玄堂猶滕公墓石之言佳城也或因其子所作不忍言墓故
改稱玄堂耳志後言以貞元六年奉安宅兆至是蓋祔貞元
六年在元和十五年前三十年乃謂葬其母王氏之年也志
云淮夷削平之明年皇帝在宥天下方宏孝理詔百辟父母
存有顯擢歿有褒贈時纘爲工部郎中由是拜公朝散大夫
祕書省著作郎致仕以史攷之當是元和十二年十一月吳
元濟伏誅之後也唐時恩例以子官而父存者雖以去官尙
得遷轉超擢仍聽其致仕較後代僅得以子官封贈者爲更
優文簡質無華書法亦秀雅前人未見箸錄當亦近年出土
者長安志載洪固鄉在萬年縣南十五里管邨四十八
大唐涇王故妃韋氏墓志銘

右墓志首尾共十八行參差不齊首行廿二字正書字徑五分文爲張周撰攷涇王名佺肅宗之子本紀載至德二載十二月封于東陽郡王佺爲涇王亦見宗室世系表韋氏祖湜父昭訓並見宰相世系表乃鄖王房之後表載湜齊州刺史昭訓太子僕墓志敘湜爲中散大夫潁王府司馬贈光祿卿與表異而昭訓贈衛尉卿表亦弗之及自當以墓志爲正德宗本紀載涇王卒於興元元年五月則妃薨時涇王尙在也志不書所葬之郡縣向來金石家皆未箸錄恐係新出土者予得之吳門碑估處察其紙墨似是關中搨手恐在陝西

黃陵廟碑

朱子韓文攷異附載石本與諸本異同於黃陵廟碑下云此

篇方從石本所稱方者方崧卿韓文舉正也予家有元刻朱文公校昌黎集併附王伯大音釋本所載與石本異者數字予生後歐趙諸公又數百年石本已不可得見據元集猶可約略知之

韓泰侍郎欽題名

右韓泰題名正書九行在永興縣泰字安平順宗朝王伾王叔文用事陰結天下名士泰與柳宗元劉禹錫等皆諂附之憲宗立皆貶謫遠州刺史稱泰有籌畫爲伾叔文所倚重能決大事以戶部郎中神策行營節度司馬貶虔州司馬終湖州刺史附見新唐書王伾傳其任漳郴睦三州刺史傳皆不載蓋略之也